

07 OCT 1996

Alatas-jambatan

JAMBATAN M'SIA-INDONESIA DIBINCANG

KUALA LUMPUR, 7 Okt (Bernama) -- Malaysia dan Indonesia hari ini membincangkan kemungkinan membina jambatan menghubungkan Semenanjung Malaysia dan Sumatera Utara, kata Menteri Luar Indonesia Ali Alatas di sini.

Ketika bercakap kepada pemberita mengenai hasil pertemuan Presiden Suharto dan Perdana Menteri Datuk Seri Dr Mahathir Mohamad sebelum itu, Alatas berkata kedua-dua pemimpin itu bersetuju bahawa jambatan yang dicadangkan itu merupakan idea baik dan perbincangan lanjut akan diadakan.

"Untuk projek seumpama ini, sektor swasta perlu menyediakan modal dan kedua-dua kerajaan perlu berbincang lagi mengenai kemungkinan ini," katanya.

Beliau berkata jambatan seperti itu akan meluaskan perhubungan darat antara kedua-dua negara.

Cadangan itu juga selaras dengan dasar pelancongan terbaru Indonesia membenarkan pelawat dari negara-negara jiran membawa masuk kenderaan sendiri ke Indonesia.

Suharto mengakhiri lawatan dua harinya hari ini.

Indonesia juga bercadang membina jambatan menghubungkan Sumatera dan Java, Java dan Bali serta di pulau-pulaunya yang lain.

Beliau berkata Dr Mahathir turut menyatakan minat Malaysia untuk menambah pelaburan di Indonesia.

Suharto menyambut baik hasrat Malaysia itu dan berharap agar tumpuan diberi ke kawasan timur Indonesia, yang sedang ditonjolkan oleh kerajaan Indonesia untuk tujuan pelaburan, kata Alatas.

"Kita sentiasa berkehendakkan projek pelaburan yang memerlukan banyak tenaga kerja sebagai satu keutamaan," katanya.

Kerjasama dalam bidang tenaga turut dibincang dan, menurut Alatas, kedua-dua pihak bersetuju meneruskan perbincangan mengenai pemasangan kabel dasar laut antara Sarawak dan Semenanjung Malaysia untuk projek hidroelektrik Bakun yang turut meliputi perairan Indonesia.

"Dalam soal ini, kerjasama Indonesia diperlukan dan kita sudahpun mempunyai perjanjian membenarkan Malaysia menggunakan hak tertentu di perairan Indonesia," katanya.

Suharto dan Dr Mahathir turut melahirkan kebimbangan mereka mengenai banyaknya kapal, khususnya yang besar-besar, menggunakan Selat Melaka selain perlunya Malaysia dan Indonesia serta Singapura mencari jalan meredakan keadaan, kata Alatas.

Indonesia juga akan menimbang hasrat Malaysia mendapatkan pasir darinya untuk tujuan menimbus guna dan pembangunan.

Alatas berkata Dr Mahathir dan Suharto berpuashati dengan kerjasama yang wujud berkaitan kawasan segi tiga pertumbuhan dalam Asean. -- BERNAMA

MAM MAI